

## **FILIPPO**

Text: Martin Hauzenberger

Am Tag u z Nacht isch är hert am Rotiere,  
Mues alles ganz elei organisiere.  
So wichtigs Züügs cha me nid delegiere.  
Da gits nur eine, wo das alles cha.

Filippo, Filippo, Filippo,  
Der ganzi Verlag in Person.  
Filippo, Filippo, Filippo,  
U z Bärn isch no grad Session.  
Är schnorrt wi ne Moore,  
Im Rat isch alls am Schnorre,  
Wär nid schnorrt, het verlore,  
Oh je, oh je, oh yeah!

Als CEO isch är d Exekutive,  
U z Bärn, dört sitzt är ir Legislative.  
Är spilt o gärn e chli d Judikative,  
Wenn är der Gwärkschaft  
Huusverbot erteilt.

Filippo, Filippo, Filippo,  
Der Montesquieu in Person.  
Filippo, Filippo, Filippo,  
Alls in Personalunion.  
Im Parlamänt parlare,  
Das tuet är sehr amare.  
Und isch es ou e Schmarre:  
Dasch fasch bi allne so.

De mues är ga ne Talkshow moderiere  
U schnäll e Chinderhort organisiere  
U d Mueterschaftsversichrig sabotiere:  
Är wott d Versichrig, dass d Mueter schafft.

Filippo, Filippo, Filippo,  
Wohär nimmt dä Maa gäng die Chraft?  
Filippo, Filippo, Filippo,  
Öb d Mueter ächt d Mueterschaft schafft?  
Mamma lavorare,  
D Vätter müesse spare,  
Der Stüürfuess achefahre,  
U d Mamma luegt i Mond.  
Die isch das schliesslech gwohnt  
U wird derfür belohnt,  
Wil si ja gratis wohnt.